



Il testo è stato donato in formato digitale al webmaster del Portale San Nicolò Politi dall'autore Benedetto Buscemi di Adrano (CT).  
Rielaborazione per la pubblicazione sul Portale a cura di Gaetano Sorge.

Ricezione del documento: *Dicembre 2013*

Nome file: *1983-Benedetto Buscemi-Nciuri ppi S. Nicola.docx*

18/12/2013 10:44:00

Rev. *1.1*



## *Prefazione*

**A**ppena finito di scrivere questo libretto dovetti scegliere un titolo da apporvi e mi sembrò che “Fiore a San Nicolò” fosse adatto ad uno scritto come il mio che non ha pretesa alcuna. Questa non è una vita documentata o storica, né tanti particolari sono curati come dovrebbero.

Nella stesura, l'unica mia preoccupazione è stata quella che potesse prendere forma in versi ciò che il mio sentimento dettava, anche se non possiede i requisiti metrici e i canoni letterari.

Ho scritto questi versi in segno di omaggio –un fiore– verso San Nicolò perché Egli ha sempre avuto nella mia famiglia una devozione particolare. La sua presenza silenziosa, ma loquace, si è fatta sempre sentire, specialmente nei momenti più delicati.

Ho scritto, inoltre, in dialetto perché, quando mio padre mi narrava la Sua vita, lo faceva parlando il nostro idioma, cosa che ho fatto pure io con i miei figli. Il siciliano possiede di quelle sfumature che si ritrovano solo nell'animo della nostra gente; gente che sente il richiamo di San Nicolò nel più profondo del cuore, anche se, nella maggioranza dei casi, lo identifica con i pregi secolari della nostra terra: coscienza della propria storia, amore per la bellezza, speranza atavica di vittoria.

Nicolò vuol dire proprio “vittoria” e la vita del nostro Santo ha fatto sì che generazioni di adraniti abbiano proiettato in Lui tutti quei moti dell'animo più silenziosi e nascosti che fanno agire l'uomo: sete di giustizia, bisogno di amore e di pace.

Chi leggerà queste righe voglia vedere in esse solo l'animo con cui le ho scritto e non le dozzinali imperfezioni di cui è pieno e, se qualcuno sarà mosso dalle mie parole nella devozione verso il Santo, avrò ricevuto la più alta delle ricompense, perché solo in questo spero.

*Benedetto Buscemi*

Gloria a lu Patri Criaturi

Gloria a lu Figghiu Ridinturi

Gloria a lu Spiritu ch'è Amuri

## *Invocazione*

**O**h Santa Vergini Matri di Diu  
versu di Tia vanu 'i mè pinseri  
e a lu tò tronu lu priari miu  
aiutu 'nvoca sutta li tò peri.

Oh Matri Santa nun sugnu 'n talentu  
dutatu di sapiri e valentia;  
li mè difetti sunu a centu a centu  
e lu cchiù grossu è di fari puisia!

Ma Tu si' la Rigina di l' Aiutu,  
Tu si' la Matri di ogni cunsigghiu  
e sugnu certu ca stannumi mutu  
sempri lu stissu Tu aiuti 'stu figghiu.

Perciò Ti preiu; Matri 'Mmaculata,  
dacci 'n aiutu Tu a li mè versi  
ppi quantu la mè rima scunucchiata  
nun canta sulu di li cosi persi.

Ora è di parrari lu mumentu  
di Nicola Puliti, lu Gran Santu,  
ca, 'n sulitudini e ccu turmentu  
e cunfidannu sutta lu Tò mantu,

‘nta ‘na grutta, facennu pinitenza,  
ogni capiri umanu iddu avanza  
ppi pussidiri la Divina scienza  
e lu pirdutu all’umana creanza.

Santa Maria Matri di l’Aiutu,  
prima di ncuminciari a travagghiari,  
dammi ‘n ‘mmuttuni ppi quantu Ti ‘scutu  
‘ccussì pricisu iù pozzu parrari.

Intra lu cori miu metti la fiamma  
e l’arduri ppi scriviri ‘n puisia  
comu Tu sula poi fari: la Mamma  
di Cristu, oh Santissima Maria.

Metticci sensu, arti e fantasia  
e ogni doti ca mi po’ sirviri  
ppi putiri scriviri ‘n puisia  
di lu Santuzzu ca mi porta a diri

tutti li voti ca c’è l’uccasioni  
di dari gloria a Cristu e a Maria,  
a Diu Patri ca è cunsulazioni  
ora e sempri gloria e accussì sia.

Mentri cci semu, Matri ‘Mmaculata,  
‘nn’appruffittu ppi ti prjari ancora  
suddu cci duni ‘n’altra uardata  
a chiddu ca nun centra e sta di fora

ccu tutti li mè versi e l'argumentu  
ca 'nta 'stu libru iù vogghiu trattari;  
levimi Tu ogni pena e turmentu  
ca 'nti la vita putissi 'ncuntrari

e, datu ca Tu sula lu poi fari,  
di cci parrari a Diu, ppi piaceri  
li mè prjeri cci l'ha prisintari  
'ccussi ca Iddu 'i putissi gradiri;

dicci di mi scusari li piccati,  
di pirdunari tutti 'i mè difetti,  
di nun uardari li sbagli passati  
e di mi dari li pinseri retti

pp'essiri degnu siguaci di Cristu,  
ppi Lu 'scutari sempri lestu lestu,  
pirchè senza di Iddu sugnu 'n tristu  
e, senza lu So amuri, fangu restu.

E ppi finiri, Matri tutta Santa,  
nun vi scurdati di li mè parenti  
e spicialmenti di chiddu ca chianta  
chiova d'arri comu fussi nenti.

Di li nimici Vui mi libirati,  
li canuscenti mei li prutiggitì,  
tutti li figghi, Matruzza, salvati  
e a mia, Vi preju, mi binidiciti.





*Per il lettore*

**L**itturi ca mi leggi curiusu  
circannu sbagghi e pregi chini a rasu  
intra di lu mè stili e lu mè usu,  
ppi tia su' 'sti paroli 'nta 'stu casu.

*“Bestia”* ti difiniu Martogliu Ninu  
(la prima cosa ca mi veni a menti)  
pirchè ppi iddu, poviri mischinu,  
lu tò giudiziu vali quasi nenti

e quannu nun ci tornunu li cunti,  
pirchè la critica ci porta chianti,  
ti chiama *“bestia”* cafuddannu punti,  
cusennu li diavoli e li santi.

Ppi mia nun si' né bestia e mancu  
unniputenti 'n materia di versi  
e iù nun ti vogghiu, litturi, stancu  
liggennu rimi e frasi ca su' persi.

E ti spiegu pirchè, caru litturi:  
lu publicu chiamatu a criticari  
havi lu gustu di 'n sceccu dutturi,  
espertu 'nta lu fenu e lu tagghiari.

Ma puru lu pueta è 'n difettu  
si scrivi senza rispittari 'n pattu:  
essiri chiaru, di parrari rettu,  
circannu sempri di essiri esattu.

E ccu 'stu intentu pricisu ti parru  
di 'n argumentu cchiù voti trattatu  
e ti prumettu ppi quantu nun sgarru  
ca mi mantegnu 'nta lu siminatu

pirchè a mia 'nteressa sulamenti  
ca tu ascuti 'sta storia di santi  
dunni lu stili nun vol diri nenti  
pirchè megghiu di mia cci nni su' tanti.

È puisia la siti d'amuri,  
la pena ca ni batti 'nta lu cori,  
la gioia ca ni dununu li ciuri,  
tuttu chiddi ca vali e ca nun mori.

La metrica, li versi? Puru iddi!  
Basta però ca nun fanu li jaddi  
pirchè si li trattamu comu stiddi  
finisci ca si pistunu li caddi.

Ogni cosa havi 'n postu dunni stari,  
ma supra tuttu vali lu sintiri  
ca intra l'animu ni fa cantari  
e... a 'stu puntu cchiù cchi c'è di diri?

Iù già prumisi di nun ti stancari,  
perciò la tagghiu e 'ncuminciu a scriviri  
di l'argumentu ca vogghiu trattari,  
ca mi sta a cori e ca mi fa sintiri

comu lu cuntadinu ccu l'aratu  
ca la terra prepara alla simenza:  
iddu simina ma ricogghi 'n'atru  
e tuttu regula la Pruvvidenza.

Perciò macari iù scrivu cuntentu,  
parrannu ancora di lu granni santu  
ca 'nta lu milli diciassetti e centu  
di Diu ni fu datu a granni vantù.

Nicola è lu so nomu, l'adranita,  
Politi lu cugnomu e la casata  
e fu lu scopu so ca la so vita  
a Cristu fussi sempri cunsacrata

Pp'aviri 'n premiu lu paradisu  
ansemi li biati, 'ntra li canti,  
ca sempri godunu d'u duci risu  
di la Santa Trinità ca ni fa Santi:

basta tanticchia di bona vuluntà,  
amuri ccu lu prossimu, ducizza,  
e ppi finiri c'è la carità  
ca ni fa degni di la gran ricchezza.



*Adrano*

**E** ora ‘ncuminciannu, vi presentu  
lu mè paisi ca havi lu vantù  
d’aviri ‘n figghiu ca ni vali centu  
pirchè la vita so lu fici santu.

Adranu è lu so nomu e la sò storia  
di tanti fatti è ‘ccussì china china  
ca la fa digna d’onuri e di gloria  
comu si fussi gluriosa rigina.

E di li tanti nomi nun vi cuntù  
ca a la so storia cci portunu vantù;  
iù mancu tentu di farivi ‘n suntu,  
‘nta ‘stu discursu mi mettu di cantu.

Li specialisti di la storia vera,  
megghiu di mia ccu pirizia rara,  
ponu cuntari pricisa e sincera  
ogni nutizia di ‘sta terra cara.

Cara pirchè mi desi li natali,  
cara ca custudisci li mè morti,  
cara pp’u mè travagghiu a lu ‘spitali,  
cara pirchè si ‘ssuppa tanti torti

di genti affarista e lazzaruni  
ca, muzzicannu peggju di li cani,  
simina morti, lassannu diuni  
li genti boni ca volunun pani.

Però la genti sana ppi furtuna,  
ca è cchiù assai, è la parti cchiù bona,  
chidda ca di parola 'nn'havi una  
e nun si cangia ppi cu' sona sona;

chidda ca soffri quasi tuttu l'annu:  
la vera umanità, chidda ca spera,  
la megghiu parti ca va travagghiannu,  
è la cchiù onesta, chidda cchiù sincera.

Pirdunimmillu 'stu sfogu, litturi;  
ma ppi cu' cridi ca la vita è amari,  
veni la bili vidennu 'u duluri  
ca certi voti 'nn'avemu a 'ssuppari.

E ti prumettu ca d'ora 'nn'avanti,  
suddu cci pozzu, intra li mè cunti  
cchiù nun ti parru di lastimi e chianti,  
né firiti di cusiri ccu punti.

Ripigghiu lu discursu supra Adranu;  
nun sempri chistu lu so nomu ha' statu,  
né lu so situ sempri 'nti lu chianu,  
mancu sapemu di cu' fu fundatu.

Di sicuru cci su' sulu li resti  
sutta la terra ancora vurricati  
ca ogni tantu ppi li manu lesti  
di genti 'sperta sunu ritruvati.

Sapemu di pricisu ca Adranu  
era lu nomu di 'n diu famusu  
ca 'n tempiu havia, cultu paganu,  
riccu d'ufferti e mitallu priziusu.

Li storici ni parranu macari  
di 'n omu eroicu natu a Curintu,  
onestu tantu ca fici 'mmazzari  
lu propriu frati ca vuleva vintu

lu metudu civili e suciali  
pirchè amava troppu 'a tirannia;  
e li cirnechi, cani 'cciziunali  
di nasu finu e si gran valia:

ppi li divoti avevunu rispettu,  
ma ccu li 'nfami, 'nveci, nuddu pattu!  
Sapennu 'u cori di cu' era rettu,  
li tinti li sbranavunu di 'n trattu.

Plutarcu, Diodoru, Elianu  
sunu tri nomi di scritturi antichi  
ca ni parrunu di l'antica Adranu,  
di la so genti e di li so spichi.

Chista è la storia, ma li so biddizzi  
sunu famusi 'ntra tutti li genti  
ca la natura ricca di carizzi  
cci desi e si vidi a lu prisenti.

Uarda tutta la valli d'u Simetu;  
ricca di pianti di ogni manera,  
di acqua, di culuri e l'occhiu letu  
sirenu si 'mbriaca 'i 'sta ciurera:

la muntagna di supra comu 'n mantu,  
lu ciumi ca scurri lentu lentu,  
di l'acidduzzi lu volu e lu cantu  
la vuci ca carizza di lu ventu.

Li so giuielli su' li munumenti  
ca ni lassanu tutti li patruni  
duminannu certuni ccu turmenti  
e tanti autri 'nveci cc'u vastuni.

Lu casteddu, lu ponti 'i Saracini,  
lu conventu di li duminicani,  
li resti antichi 'n menzu li giardini  
e li chiesi di l'epuchi cristiani.

Ccà tuttu parra di gioia e d'amuri  
e tistimonia di lu travagghiari  
ca 'nti lu tempu li pruginituri  
hanu statu capaci di criari.



Amu lu mè paisi, amu Adranu,  
amu lu nomu sò, la terra mia  
pirchè profuma d'anticu, d'arcanu:  
tuttu intra 'sta terra è puisia.

'Nta 'stu paisi ppi vuliri 'i Diu  
'nti l'annu milli centu diciassetti  
l'anima di 'n Santu cci nasciu  
e Diu stissu fu ca ni lu detti.



*Sonetto d'apertura*

**N**ui tutti hamu statu picciriddi.  
Quanti voti li patri ni cuntanu  
'ddi cunti di rizzari li capiddi,  
di beddi fati e di 'n regnu luntanu.

A mia nicu mè patri mi cuntau  
la vita d'u Signuri e di li Santi  
e li cosi di Diu mi 'nsignau,  
li prjeri a la Vergini e li canti.

Assai mi parrau di San Nicola,  
di la So vita e di comu muriu  
e iù, criscennu sutta la so scola,

scrivu 'sti versi sulu ppi disiu  
di gridari ccu cori e ccu parola:  
viva Nicola 'u rimita di Diu.



*Adrano e nascita di Nicola*

‘**N**ti lu cori di ogni adranita  
ppi San Nicola c’è ‘n postu spiciali:  
è ‘n puntu fermu ‘nti la nostra vita;  
Iddu ni uarda contra d’ogni mali.

Semu gilusi di lu nostru Santu,  
semu urgugliusi di lu paisanu;  
vicinu a Iddu nun avemu scantu  
pirchè ni guida e ni teni ppi manu.

Chidda ca iù vi cuntù e la So storia,  
di comu cci ‘rrivau ‘n Paradisu  
e comu ‘n celu ebbi la so gloria  
gudennusi di Diu sempri lu visu.

Prima di ‘ncuminciari ‘na prjera  
mi pari giustu di fari a Maria  
pirchè ccu fidi cchiù viva e sincera  
‘nti lu bisognu ‘a chiamu Matri mia.

Santa Maria, Matruzza di Diu,  
cunsigghimmilla Tu qualchi parola,  
comu l’aceddu, ca fa ciu ciu,  
‘nsegnatu di la matri , certu vola;

fammi parrari di lu mè paisi  
e di lu Santu ca tutti unuramu;  
dammilli Tu li pinseri pricisi  
e fa ca tutti l'omini n'amamu.

Di lu paisi miu vogghiu parrari  
e di li cosi beddi ca ci stanu,  
ma prima vi lu vogghiu prisintari:  
vecchiu di tri millenni, nomu Adranu.

A li so spaddi c'è lu Mungibeddu  
e lu Simetu scurri a li so peri;  
supra di li so casi lu casteddu  
e li giardini davanti e d'arri .

Lu nomu pigghia di 'n diu paganu  
ca lu so tempiu avia 'nta 'sta cuntrata  
ca prima di Gesù, tutti lu sanu,  
dei a munzeddu jnchevunu la strata;

pirchè c'è sempri chiddu lazzaruni  
ca sfrutta la 'gnuranza di la genti  
e, quannu trova chiddu cchiù minchiuni,  
'nventa li dei comu fussi nenti.

Su' li so figghi genti di travagghiu,  
valenti artigiani e muraturi  
ca 'nti la vita trovunu lu stagghiu  
e 'a forza ca ni desi lu Signuri.

Amu lu mè paisi ca mi desi  
'u patri, 'a matri e tutta 'a mè famigghia;  
amu 'i strati, li casi, li so chiesi  
e Cristu ca lu cori mi cunsigghia.

Di la so storia Nicola è lu vantu,  
la so banneru ca sfida lu ventu  
e la so vita è comu lu mantu  
di lu pasturi supra di l'armentu.

Doppu d'u milli centu diciassette  
nasciu ppi l'Amuri comu 'n gigghiu  
e Diu ppi Patrunu ni lu detti,  
d'Alpina e d'Almidoru unicu figghiu.

Almidoru di nobili casatu  
ccu la so spusa Albina nun ha avutu  
la gioia di 'n eredi disiatu  
tantu ca vecchiu già è divinutu.

Albina puru idda vicchiaredda  
havi gran fidi perciò miatidda  
si rivulgiu spirannu a la cchiù bedda  
di tutti li matruzzi, Unica Stidda.

E li prighieri di li du' Puliti  
ebbiru gioia d'essiri 'scutati  
di Diu Patri ca li visti uniti  
di lu primu mumentu maritati.

Prjavunu sinceri li mischini  
e ppi vuliri di prugetti arcani  
furunu di grazii chini chini  
e li spiranzi nun furunu vani.

La Pruvvidenza regula e cumanna:  
c'è sempri 'u ventu arreri d'ogni unna  
ca nuddu miritassimu la manna  
e la prjeri 'i nuddu 'u celu sfunna!

Appena ca nasciu lu lavanu  
e l'acqua fu ittata 'nta 'na 'gnuni,  
ma li parenti si miravighianu:  
spuntau 'na surgenti a 'ddu cantuni.

Lu stissu jornu 'n chiesa fu purtatu  
e 'ntra li cristiani fu scrivutu:  
Nicola 'ddà di nomu fu chiamatu,  
'ddu gigghiu jancu a la fidi ciurutu.

Di l'acqua santa l'Armuzza è lavata,  
di l'acqua ca cancella li piccati;  
tri voti 'nti l'acqua fu 'bbunnata  
in nomu di la Santa Trinitati.

E fu signatu ccu lu santu segnu  
ca fu virgogna finu a Gesù Cristu  
e doppu d'Iddu divintau lu segnu  
d'u Spiritu ca 'n celu fa 'n acquistu.



*Primi anni*

**S**i visti ch'era Santu, nicu nicu,  
pirchè 'nta setti jorna tri diunava;  
la pena di la matri nun vi dicu,  
ma Diu la saluti cci la dava.

Sò patri ccu sò matri cci 'nsegnanu  
l'amuri ppi la Vergini Maria  
ca 'nti la fidi d'ogni cristianu  
è comu luci 'nti la retta via.

Di nicu Iddu scappau di li piccati  
comu di li sirpenti vilinusi  
e, comu fanu tutti li Biati,  
nun discurreva di cosi fitusi.

Certu, criscennu a la scola cci ju  
e a leggiri currennu si 'mparau  
pirchè, 'mmuttatu di granni disiu,  
lu maistru siguiu ca lu 'nsegnau.

Parrava picca e sempri misuratu,  
si stava mutu ccu la genti granni,  
'nta tutti li discursi era 'ssinnatu:  
crisciu cchiù di menti ca di anni.

‘N jornu liggìu lu saggiu divinu  
ca dici: “Visitati li malati,  
pirchè a cu’ soffri cci Sugnu vicinu;  
si lu faciti vui siti Biati”.

Ppi chistu si videva ‘nta li casi  
dunni c’era la genti bisugnusa;  
porta la Pruvvidenza unni trasi  
(cosa ca ‘u nostru tempu cchiù nun usa!)

Beddu di facci seriu e maistusu,  
uardari si faceva si passava;  
ccu tutti si mustrava rispittusu  
e speci ccu li vecchi ca ‘ncuntrava.

‘Ccussì Cola crisceva santamenti,  
comu di ‘n ciuri uardatu di Diu;  
“Cchi beddu figghiu, diceva la genti,  
saggiu ‘nti lu parrari, castu e piu”

ccu tutti si mustrava dilicatu,  
ccu vecchi, nichì, granni e picciriddi,  
ma spicialmenti ccu lu sbinturatu  
ca di li uai si tira li capddi.

*Nicola “Lu zitu” in fuga*

‘N u jornu fa Almidoru ‘sta pinsata:  
“E’ tempu di quazallu lu mè ciatu;  
si pigghia ‘na mughieri ‘ffizziunata,  
pozzu muriri, ‘u lassu sistimatu”.

Si misi ccu Albina a discurriri  
ppi cci circari lu megghiu partitu  
e ‘na carusa bididi di vidiri  
truvau ppi lu fari prestu zitu.

Li puvireddi avia ppi amici,  
quannu cci prisintanu ‘dda carusa:  
“Chista è la zita – lu patri cci dici –  
e vogghiu ca diventa la tò spusa”

Ma di Nicola la menti è ppi Diu  
e lu so cori è sulu ppi Maria;  
ppi li ricchizzi nun havi disiu  
ca lu Vangelu è la sula so via.

Cunvincirlu nun ci po’ mancu la matri,  
né li prieri d’amici e parenti  
e siddiatu cci ordina ‘u patri:  
“Dumani ti mariti e ‘n tempu nenti!”.

Culuzza chidda notti nun durmiu,  
lu cori nun sapia cchi hava a fari:  
si sceglieri li nozzi e lu curtiu  
o si ppi Cristu li beni lassari.

La tintazioni la potti vinciri  
mittennusi ‘n ginocchiu e dumannannu  
a Cristu Diu ca prima di ‘nchiariri  
cci lu livassi d’u cori ‘dd’affannu.

E lu Signuri cci parra e cci dici:  
“Scappitinni e vatinni all’Aspicuddu,  
dunni li petri su’ li sulì amici  
e di la genti nun ci passa nuddu”.

E la matina prestu lu chiamanu:  
“Nicola si’ susutu o sta’ durmennu?  
Li servi tutti cosi preparanu...  
nuddu rispunni... ma cchi sta facennu?”

Sfunnamula la porta e la rapemu!  
– ma ‘dda stanza vacanti la truvanu –  
A li ‘nvitati ora cchi dicemu?”  
Lu patri e la matri sculuranu!

Almidoru si ‘ssetta sbalurdutu,  
cci cascunu li vrazza, nun ci cridi;  
mentri lu parintatu resta mutu ,  
Albina si pizzia ccu chianti e gridi:

“Figghiu ciatuzzu, pirchè mi lassasti;  
figghiu curina dunnì ti nni isti;  
ora ca la tò zita ‘bbannunasti,  
figghiu miu di megghiu cchi vidisti?”

Figghiu pirchè ,mi dasti ‘stu duluri?  
Figghiu, tuttu ‘u ‘ppizzasti lu mè cori!  
Comu, ca ti crisciu ccu suduri!  
Figghiu, tò matri di lu chiantu mori!

Senza di tia cchi cci campu a fari,  
senza di tia ca si’ la vita mia;  
ppi tia sulu valeva lu campari,  
ppi tia ora mi manca la valia!”

Lu patri si fa forza e dici tunnu:  
“Albina nun mi chiangiri ‘na vita;  
macari ca scappau a finu ‘u munnu,  
lu cercu, ti lu porta e si marita!

Ma ccu quali curaggiu si nni ju?  
Cci pensa a la pena di cu’ resta?  
Ma si lu ‘ncontru, quantu è veru Diu,  
l’ha cunvinciri o cci scippu la testa!”



*Nella grotta dell'Aspicuddu*

**C**omu quannu l'Ebbrei tutti scappanu  
foru guidati di lu Santu Focu,  
puru Nicola, partutu d'Adranu,  
di 'n aquila guidatu è a lu so locu.

'Dda cuntrata era china di sirpenti,  
brutti armalazzi ca fanu spagnari,  
simbulu amaru ppi tutti li genti  
di quannu Adamu si fici tintari.

E ccu li serpi c'erunu li lupi  
e li corvi ca mangiunu li morti;  
erunu chini tutti 'ddi sdirrupi:  
uai ccu cci passau ppi mala sorti!

Ma a lu passari di Cola scappanu,  
ebbiru spagnu 'dd'armali schifusi:  
lu rimitu di Diu nun lu tuccanu  
e ppi 'ddà vota ristanu cunfusi.

'Na grutta Iddu ppi casa trovau  
e ppi durmire li petri pizzuti;  
ppi d'arrieri lu munnu si lassau  
e tutti li so cosi scunchiuduti.

Priannu cci passava li jurnati  
ppi si putiri l'alma so salvarì,  
ppi jrisinni 'n menzu li biati  
e tutti li divoti so jucari.

Lu Signuri prjava ppi la genti,  
ppi daricci la fidi a tutti pari;  
capennu li difetti di la menti,  
certu lu mali nun ni pò tintari:

intra lu cori 'nsemi ni purtamu  
la siti d'u cumannu e di l'aviri;  
'stu desideriu ni lu desi Adamu  
e ni lu desi ppi nun ni pirdiri,

pirchì, capennu li cosi sbagghiati,  
putemu 'pprizzari li cosi diritti  
e, siccomu nun semu 'mmaistrati,  
circamu largu quannu semu stritti

e ni facemu largu ppi campari,  
ma lu livamu a cu' ni sta vicinu,  
perciò, si cci putemu di rubbari,  
ni lu scurdamu 'u cumannu divinu

ca è chiddu di stari tutti uguali,  
di ni iutari quannu semu scarsi,  
senza vastuni e senza principali  
e di campari quannu semu scarsi.



Ma 'u primu fu Cainu, 'mmiriusu,  
quannu 'mmazzau lu so stissu sangu,  
ca ni desi l'esempiu cchiù udiusu  
di comu casca l'omu 'nti lu fangu.

Qunti voti a Nicola ca prjava  
Turnau 'nti la menti lu passatu,  
pinzava a so matruzza ca l'amava,  
lu vecchiu patri afflitu e scunsulatu.

Lu cori si faceva picciriddu,  
'nti l'alma cci pareva di brusciari  
comu su si fa sira lu ciuriddu  
chiudi li fogghi e aspetta lu 'gghiurnari.

Ma quannu cci pareva di muriri,  
'n ginocchiu di gran cursa si mitteva  
e lestu cominciava a cumpatiri  
tutti li peni 'i Cristu ca mureva

supra la cruci tristi e suffirenti,  
sulu, abbannunatu di l'amici  
e la so pena cci pareva nenti  
ca di lu Celu Diu lu binidici.



*Altra fuga di Nicola*

**T**ri anni cci passau ‘ntra la sciara,  
sempri prjannu a Diu comu ‘n Santu,  
e ppi mangiari sulu l’erba amara,  
chiamannu la Madonna comu ‘n mantu.

‘Na vuci poi cci dici ‘na matina:  
“Tu scappa, chistu postu l’ha lassari;  
‘na cummitiva lesta si ‘vvicina,  
li parenti ti venunu a circari”.

Nicola, allura, prima di partire,  
uardau Adranu ppi lu salutari  
ccu l’occhi russi pronti ppi chiangiri  
riorda ‘nti la menti li so cari:

pinzau a so matruzza, cchi duluri!  
‘na lacrima di l’occhi cci cascau,  
c’ancora lu disidira ccu arduri  
e havi tri anni di quannu scappau!

“Addiu Adranu, addiu;  
addiu, terra natali;  
addiu paisi miu  
di storia senza uguali;

addiu terra d'aranci,  
di rosi sempri 'n ciuri;  
addiu, lu cori chianci,  
lassariti è 'n duluri.

Terra udurusa, addiu;  
addiu terra d'amuri;  
'nti tia ebbi lu ciu,  
lu pani e lu Signuri.

Pueti, artisti e Santi  
sunu li tò curuni,  
di menti tu 'nn'hai tanti,  
ppi figghi hai liuni!"

Doppu, l'ultima vota taliau  
'ddu panorama beddu di vidiri  
e 'nti lu cori tuttu s'u stampau,  
ma la tristizza nun lu lassa jri.

"Basta, basta, facemuni curaggiu!  
Signuri miu, dimmilla Tu la strata,  
pirchè cu' chiangi nun si chiama saggiu  
e la tristizza smenna la iurnata".

Si pigghia lu vastuni e si 'ncamina  
a 'n menzu di li petri, sciari, sciari  
ca li pedi e li jammi si macina:  
rizzunu 'i carni sulu a cci pinsari!

*La tentazione*

**D**oppu la sciara, ‘u voscu ‘ncuminciau,  
‘nfutu, senza lustrura ‘ntra li rami,  
ca pari ca lu sulì si ‘mmucciau  
e ripetiri senti ‘n zoccu chiami.

‘Nta ‘stu silenziu di fari spagnari,  
Nicola si v’a ‘ssetta supra ‘n massu:  
è troppu stancu di ‘ddù caminari,  
talìa lu sangu ca lassa lu passu.

Mentri pigghiava ciatu, d’impruvvisu  
cci spunta ‘n cavaleri maistusu;  
lu uarda e vidennu dici a chistu:  
“Cu’ si’ e dunni vai, beddu carusu?”

Nicola cci rispunni pruntamenti,  
dicennucci lu nomu e lu casatu,  
lu modu ca ‘rrivau a lu prisenti,  
comu di ‘n ancileddu fu jutatu:

“Lassaiu la famigghia e li ricchizzi  
pirchè su’ fumu e prestu si nni vanu;  
vogghiu essiri scarsu e senza vizzi,  
ma pulitu ‘nto cori e ‘nti la manu”.

Lu cavaleri cci dissi: “Si’ pazzu!  
Chisti su’ fissarii, ascuta a mia;  
si m’ubbidisci, ti dugnu ‘n palazzu  
ccu attornu ‘na bedda massaria;

tanti cummudità ti vogghiu dari  
pirchì, si vidi, si’ ‘n carusu saggiu;  
ansemula putemu cumannari,  
basta ca tu lu tagghi ‘stu viaggiu.

Lu vidi ‘stu cavaddu? Ti lu dugnu;  
uarda cchi ti facisti ‘nta li peri!  
Lu munnu ti lu mettu ‘nta lu pagnu:  
mi basta sulu ca mi veni arrieri”.

Nicola cci ristau senza ciatu,  
doppu ca si sintiu li so paroli,  
e nun ci casca, Diu sia ludatu,  
pirchì capisci ca l’armuzza voli.

Ccu ‘n ramu si sbarrau lu vastuni,  
‘mmustrannucci la cruci a lu dannatu:  
“Lu Patr’Eternu sulu è mè patruni,  
vatinni arrieri, vatinni sbinturatu!”.

Lu cavaliere ‘a facci si cangiau  
mentri di l’occhi spuntunu tizzuni;  
e ‘a terra a li so pedi si spaccau  
a lu cumannu di ‘ddu gran liuni.

Di colpu la natura si cangiau,  
l'ancileddi si misiru a cantari  
ppi la vittoria ca Cola purtau  
contra lu mali ca 'u vosi tintari.

Lu celu si grapiu e l'ancileddi  
cci vinniru a purtari lu mangiari  
ppi cunsulari 'ddi dù occhi beddi  
e 'ncuraggiallu ancora a caminari.

La forza cci turnau e la valia,  
camina e cci pari di 'bbulari  
e lu juta la Vergini Maria  
ccu Cristu e li santi tutti pari.





*Incontro a Maniace con S. Lorenzo da Frazzanò*

**D**oppu, prima ca ‘u sulì tracuddau,  
‘rriuvau a lu cunventu di Maniaci;  
a la porta currennu tuppuliau  
ppi trasiri e truvari ‘ddà la paci.

Si vosi prima ‘i tuttu cunfissari,  
doppu lu Sacramentu si pigghiau;  
si misi ccu li monici a prjari  
lu Patr’Eternu ca tuttu criau.

Cantava comu ‘n ancilu di Diu  
li lodi di la Vergini Maria;  
liggeva lu Vangelu ccu disiu,  
la Bibbia e la santa Litania.

Li monici facevunu la gara  
ca tutti cci vulevunu parrari;  
ma già ‘ntra d’iddi c’è ‘na perla rara:  
Larenzu Frazzanò, Santu macari.

E li du’ santi quannu si ‘ncuntranu,  
senza di ‘na parola si capenu;  
ccu tantu amuri l’alma si uardanu,  
la menti saggia e lu cori sirenu.

Lu tempu lu passavunu prjannu,  
senza pinsari mancu a lu mangiari;  
miraculi si jevunu cuntannu,  
tutti nun li putemu ricurdari.

‘N jornu Larenzu a iddu cci spiau:  
“Dunni li trovi li cosi cchiù cari?”  
e Nicola, ridennu, lu uardau:  
“Ascutimi, ‘na cosa t’ha cuntari:

Supra di ‘n ciuri ‘rrivau ‘na farfalla,  
cuntenta di la vita e di campari,  
ccu l’ali aperti attornu ca cci balla  
ca ti ricrii sulu a talari.

E mentri ca ballava, lu ciuriddu  
ccu la farfalla pigghia a discurriri  
e cci spiau si dunni fa friddu  
cci sunu cosi beddi di vidiri.

Ma la farfalla cci dissi: “Suruzza,  
cuntentiti di l’acqua ca ti vivi  
e di la terra ca ti fa bidduzza:  
nun crisci erba ‘n menzu di la nivi.

E lu ciuriddu si tranquillizzau  
di ‘ddi paroli ditti ccu caluri  
dittati di l’amuri e lu lassau  
lu disideriu ca porta duluri

Pirchì, circannu li cosi luntani,  
nun li uardamu li cosi vicini  
ca sunu chiddi cchiù duci e cchiù sani  
e sunu beddi comu li matini

quannu spunta lu sulì di lu mari  
e ti 'ccarizza 'u ventu jucaloru,  
mentri ca pensi li cosi cchiù cari  
e ca ti teni stritti comu l'oru".

Doppu ca cci cuntau 'stu paraguni,  
Cola cci dici comu fu chiamatu,  
tutta 'a so vita, prjeri, diuni  
e comu udiava lu piccatu.

Quannu fu lu mumentu di partiri,  
Lorenzu ad iddu 'u vosi 'ccumpagnari:  
"Iù vaiu a Fragalà, cci voi viniri?  
Ansemula putemu caminari".

E l'altu accussì cci rispunni:  
" 'N pocu di strata la putemu fari  
e doppu iù ti lassu, amicu miu,  
ca ancora assai luntanu haiu 'a 'rrivari;

iù sugnu a lu Calanna destinatu  
e si ti capitassi di passari  
di ora ti cunsidiru 'n vitatu:  
a tia ti 'spettu, venimi a truvari".

‘Nsemula tanti jorna caminanu  
spartennusi lu pani comu ‘i frati;  
quaanu fu lu mumentu si lassanu,  
‘cuddannusi e chiangennu, li biati.

Dissi Nicola: “Fratuzzu Larenzu  
priamu ansemi prima ‘i ni spartiri  
ca si mittemu ‘a prjera ‘nto menzu  
la nostra strata si po’ cunchiudiri”

Larenzu rispunniu: “Hai raggiuni;  
prjamu ‘nsemi la Matri di Diu  
di ni guidari ‘ntra voschi e vadduni  
e di iutari ogni nostru disiu”.

Dissiru ‘nsemi: “Matruzza Maria  
ca ‘n celu siti ‘na stidda lucenti,  
ni affidamu a Vui, Vergini pia;  
aiutatini Vui, mantu d’a genti”.

## *La sorgente miracolosa*

**N**icola appoi ripigghia la so via  
e ‘n aquila cci mustra dunni iri;  
finiu ca si stancau ‘dd’alma pia,  
sintiu bisognu forti di viviri.

Ma a lu patiri di Cristu pinsau,  
quannu ‘nti lu disertu si nni ju  
e trenta jorna sulu diunau,  
suffreenu siti lu figghiu di Diu.

Si fa forza, ripigghia a caminari:  
“Nun sugnu forti comu a Tia, Signuri,  
la dibulizza mia voi pirdunari?  
Tu ni vidisti di tanti culuri;

supra la cruci, prima di muriri,  
avisti siti e ti desiru feli;  
dammilla Tu la forza di suffriri,  
dammi la cruci comu fussi meli”.

Caminava ‘ppuggiatu a lu vastuni  
sutta lu suli ca lu caliava,  
ca tanti ni passau munti e vadduni  
e sempri ccu ‘ddà siti ca ‘u ‘bbrusciava.

A ‘n certu puntu li forzi mancanu,  
li jammi so si misiru a trimari  
e li vrazza di chiummu divintanu:  
nun potti fari a menu di cascari.

Cascau ‘n terra comu casca ‘n piru  
quannu si stanca di stari ‘ppinnutu,  
pirchè mancau la vampa a lu ciru,  
pareva ‘n saccu a lu sulì stinnutu.

Isau la testa e lu celu uardau,  
cci fici ‘sta prjeri a lu Signuri:  
“Comu ‘nti lu disertu si salvau  
lu populi d’Abramu piccaturi,

quannu cci dasti l’acqua di lu massu  
si rfriscau di la gran su lagna,  
si Ti piaci, ripigghiu lu passu,  
ma fammi tirminari ‘sta siccagna”.

E all’impruvvisu, ‘lluminatu ‘i Diu,  
sicuru ‘nti la forza di la fidi  
e doppu ca di bottu si susiu,  
fa ‘stu purtentu c’ancora si vidi:

uardau ca c’era ‘n massu ‘ddà vicinu,  
lu tocca cc’u vastuni e cumannau:  
“In nomu di lu Diu Unu e Trinu,  
grapiti” e l’acqua cci spuntau.

Nisceva frisca, ‘bunnanti e pulita  
e currennu pareva ca cantava;  
si la viviu e cci desi la vita,  
‘nti li so vini la forza turnava.

Comu la pianta ‘bbuccata di latu,  
sutta lu suli ca la marturia,  
basta cci metti lu zuccu ‘bunnatu  
ca s’addirizza e ripigghia valia,

Nicola si cangiau ‘nti la facci  
e intra l’occhi sò spariu lu velu;  
la Madunnuzza a Cristu dissi: “Dacci  
a ‘stu gran Santu ‘n premiu di celu”.

Doppu tant’anni ‘sta frisca surgenti  
ancora l’acqua cuntinua a dari;  
cci hanu vivutu tanti e tanti genti  
ca nun si ponu di certu cuntari.

‘Sta funtana, chiamata “L’acqua Santa”,  
miraculi ha fattu assai assai,  
ma la So acqua lu Cristu ni vanta  
pirchè cu’ ni vivi nun mori mai.





*Invocazione - Alcara li Fusí*

**M**atri di Cristu, Vergini Maria,  
parti di 'stu travagghiu è tirminatu;  
comu 'mmustrasti a Nicola la via,  
'ccussì 'nti lu mè cori l'hai dittatu.

Ppi mia Tu si' lu focu, si' l'Amuri,  
si' comu l'acqua ppi li pisciteddi;  
ccu lu tò focu Tu mi du' caluri  
e mi governi intra li tò agneddi.

Tu si' la stidda di li naviganti,  
la porta d'oru di la casa 'i Diu;  
Tu si' ' la Matri di tutti li Santi,  
si' Tu la strada di lu scrittu miu.

Dammi la forza ancora di parrari  
d'u Santu ca Ti vosi tantu beni  
e ccu 'a so vita Ti vosi cuntari  
di la so genti li gioi e li peni.

Ti preju ancora Matri 'Mmaculata,  
a Tia ca si' l'aiutu di li genti,  
suddu cci duni n'otra uardata  
a lu mè scrittu: spingimi la menti.

Fammi parrari macari d'Alcara,  
città ccu Adranu cara a San Nicola,  
ca puru iddi purtannu la vara  
lu chiamunu ccu fidi e ccu parola.

Alcara, Alcara, terra biniditta,  
scartata di Diu ppi 'stu granni Santu,  
sutta 'na rocca pizzuta e diritta  
ha 'n frunti 'n panurama ca è 'n' incantu.

Lu Ghida cci v'a passa 'ddà vicinu;  
'nti l'estati di acqua cci nn'è picca,  
di 'nvernu 'nveci d'acqua è chinu chinu  
e 'sta cuntrada d'albiri è ricca.

È la so genti gintili e curtisi,  
garbata 'nti li modi e 'nti li fari;  
canusciu a tanti 'i 'stu beddu paisi,  
genti ca stimu comu amici cari.

Alcara ama Nicola ccu gran fidi,  
facennu gara a la genti d'Adranu,  
stimulu, esempiu ppi cu' nun ci cridi,  
ppi canuscenza di quanti nun sanu.

## *La grotta del Calanna*

**D**oppu di l'acqua Nicola è 'n caminu,  
sempri guidatu di l'acula santa,  
ca lu porta a 'na rocca 'ddà vicinu  
e scumpari bulannu e 'ddà lu chianta.

Lu Santu lu capisci ca 'rrivau,  
si uarda 'ntornu ppi si 'mpratichiri;  
ora ca lu viaggiu tirminau  
trova lu postu ppi dunni muriri.

La nova casa ca Diu cci desi  
fu 'n'otra grutta 'n mezzu li frattini;  
nun fu scavata di pala e di fesi,  
nun c'era porta e mancu finistrini.

Lu tempu giustu ppi si rimirari,  
di vidiri la grutta quantu capi,  
si metti 'nginucchiuni ppi prjari  
lu Patr'Eternu e lu cori Ci grapi.

“Gesù – cci dici – sentila 'sta vuci;  
ora ca lu viaggiu ccà finiu  
vogghiu purtari 'nsemi la tò cruci  
ppi tutta la mè vita, Unicu Diu”.

‘Dd’armuzza santa cci dici: “Signuri,  
pirdunimi, Ti preju, li piccati,  
ca ‘nn’haiu fattu di tanti culuri  
‘nta lu passari di li mè jurnati”.

La putenza di Diu ca tuttu vidi,  
capisci la purizza di Nicola;  
ppi cu’ nun sapi e fursi nun ci cridi:  
la prjeri di l’umili a Diu vola.

Mentri Nicola preja ‘nti la grutta,  
‘ncumincia a smanari lu so cori;  
‘ddà cosa ca pinsamu si fa ‘ncutta,  
cci veni di ‘ccupari, pari mori.

“Signuri, dimmi Tu cchi haiu a fari;  
vulissi iù truvare ‘na chiesudda  
ppi mi putiri prestu cunfissari,  
quantu mi levu di l’alma la rudda;

mi la vulissi ‘na missa gudiri,  
ppi l’Ostia Santa mi spinna lu cori,  
dammi la luci, fammilla vidiri,  
prima ca lu sulì tracodda e mori”.

Mentri prjava ‘n sonu di campani  
di luntanu cci parsi di sintiri:  
“Cchi è ca sentu? Haiu l’aricchi sani?  
Di dunnì chistu sonu po’ viniri?”

‘N facci a lu munti dunnì iddu stava  
c’era ‘n cunventu, locu di prjeri;  
vicinu ‘n ciumi currennu cantava:  
fu la risposta a ‘ddù cori ca spera.

Nun era intra la città d’Alcara,  
ma ‘n menzu la campagna e la natura  
dunnì la vita ppi Diu si para  
come ‘na spusa ccu ogni primura.



*Il Rogato e l'incontro con il Gusmano*

**P**arti lu Santu, pigghia la scinnuta,  
'nta li pedi havi l'ali, pari 'bbola;  
cu' ti 'mmutta, cu' è ca ti 'ssicuta?:  
la granni fidi a Cristu di Nicola.

Arriva a lu cunventu, tuppulia.  
“Fratuzzu grapi, m'haiu a cunfissari;  
vogghiu prijari 'a Verigini Maria,  
Cristu e San Basiliu macari”.

Lu monicu ci grapi e lu talia,  
tuttu sudatu (cu' sapi com'è stancu);  
cci dici: “Trasi 'n nomu di Maria”  
e 'nta chiesa lu porta arrieri 'n vancu.

“Si 'spetti du' minuti, ora veni  
patri Gusmanu nostru cunfissuri  
e, si tu voi, cunticci li peni  
di l'alma tò e tutti li duluri”.

Cci va e lu cunfessa lu Gusmanu:  
“Chisti cchi su' piccati, figghiu miu?  
Si tu cci stai fatti basiliano,  
si' roba bona ppi la vesti 'i Diu.

Ma cuntimi anticchia la tò vita;  
di dunni veni, com'è ca ti chiami,  
pirchè vulisti fari lu rimita,  
suffrennu assai di siti e di fami?"

Lu libru di prjeri, lu rusariu,  
la vesti azzurra Cola li 'ccittau  
ma ccu lu pattu 'i stari sulitariu;  
di la so vita doppu cci parrau.

Ccu lu Gusmanu parranu di Diu;  
lu frati rettamente lu guidau,  
la Bibbia e lu Vangelu cci liggiu  
sinu ca a menti tutti cci 'nsignau.



*La preghiera*

**L**a prjeri di Nicola, la cchiù cara,  
fu chidda ca lassau lu signuri  
e comu meli 'nti la vita amara  
la ricitava ccu fidi e ccu arduri:

“Oh Santu Patri nostru,  
Vui ca 'n celu stati,  
Santu lu nomu Vostru  
cantunu li Biati;

di veniri 'spittamu  
lu Vostru Santu Regnu;  
la voluntà spiramu  
di Diu fari ccu 'mpegnu

e comu 'n celu è fatta  
'n terra sia macari;  
si la facemu esatta,  
è megghiu lu prjari

tutti li nostri jorna  
danni pani macari  
e ppi li Grazie Vostri  
l'erruri pirdunari;

‘nta li tintazioni  
vulitini jutari,  
puru di li ‘ntinzioni  
do’ mali libirari”.

Cuntinuu lu diceva e vulinteri,  
cunsidirannu ‘ddi santi paroli  
e riflittennu ‘nta li so pinseri  
spenni la vita comu Diu voli.

Si rivulgeva a la Matri Maria  
tutti li jorna di lu calannariu  
chiamannula la “duci Matri mia”  
e dicennusi sempri lu rusariu;

“Ti salutatu oh Maria  
di la Grazia sempri china;  
lu Signuri è ccu Tia,  
biniditta Tu Rigina

‘ntra li donni prifirita;  
binidittu lu Tò pettu  
c’ all’ Amuri desi vita:  
Gesù Cristu miu diletto.

Santa Matri ‘i nostru Diu  
ppi nui preja piccaturi  
spicialmenti ‘nti l’addiu,  
Matri di lu granni Amuri”.

*Vita eremitica*

**P**assau trent'anni facennu la spola  
di la so grutta 'nsinu a lu conventu:  
quanta stratuza macinau Nicola  
senza lamenti, ccu cori cuntentu;

tutti li sabbiti, 'nsinu a la morti,  
Nicola a lu Rugatu si nni va;  
ppi l'Ostia Santa havi disiu forti:  
di la so vita 'u sulu scopu è 'dda.

E Nicola fu sempri puntuali,  
macari 'nti lu 'mmernu ccu lu friddu,  
o si chiuveva o c'era timpurali,  
tuttu 'ssuppatu, scauzu e suliddu.

Li frati tutti pari e lu Gusmanu  
'spittavunu prjati ca vineva,  
c'ormai lu canuscunu e lu sanu  
la vita di prjeri ca faceva.

Era d'esempiu ppi tutti li frati,  
vidennulu 'nta chiesa 'nginucchiatu,  
prjari Diu ccu l'occhi spalancati,  
'nti l'aria di terra sullivatu.

Quannu chiuveva, ccu lu ciumi chinu,  
ppi passallu nun si spacinziava,  
sempri sicuru 'i l'aiutu divinu,  
supra di l'acqua iddu caminava.

Si ni turnava doppu 'nti la grutta,  
pistannusi li carni 'n pinitenza  
pirchè 'ddà vita lu celu cci frutta  
a Nicola ca a Diu sempri penza.

Lu sulì ca spuntava di matina  
ccu li raggi la facci cci vasava  
e, cuntimplannu l'opira divina,  
ccu 'sti paroli 'a Vergini ludava:

lu sulì ca va spunta di lu mari  
e brilla 'ntra li fogghi di matina  
cosa cchiù bedda nun po' 'lluminari  
di Tia ca si' la mè Rìgina.

Puru li ciuri uardi nicareddi,  
ca su' li perli di li tò giardinu,  
accantu a Tia parunu cchiù beddi  
e ti li crisci ccu Amuri divinu.

Quannu lu uardu 'stu quattru d'amuri,  
Lu cori si rimodda e mi scumpari,  
la menti si lu scorda lu duluri  
e si nni sazia sulu a taliari.

*L'aquila*

**S**u' tutti uguali 'i jorna di Nicola:  
prjeri d'a matina a la scurata,  
pirchè lu tempu scurri, pari 'bbola,  
quannu si pensa la cosa cchiù amata.

Quann'era lu mumentu di mangiari,  
la Puvvidenza sempri cci pinsava:  
l'acula santa 'n celu cci cumpari  
purtannucci lu pani ca bastava.

Ccu menzu pani passava lu so jornu,  
tantu ppi diri ca iddu mangiava,  
e cci bastava sinu a lu ritornu  
di l'acula pricisa c'arrivava.

L'acula forti, simbulu divinu,  
è puru 'u stemma di la mè Adranu  
e, comu pari, havi l'occhju finu  
comu lu Santu ca uarda luntanu.



*Secondo incontro con San Lorenzo*

‘**N**sabitu Nicola a lu Rugatu,  
doppu ca la Missudda si gudiu,  
stava prjannu ‘n terra ‘nginucchiatu  
lu Cristu Unniputenti Unicu Diu.

‘Nti lu cunventu c’era di passaggu  
Larenzu Frazznanò ca già ‘ncuntrau  
Nicola; ora vecchju, Santu e saggiu  
lu canusciu, lu chiama e cci parrau:

“Mi pari ti canusciu, amicu miu,  
aspetta, aspetta... fammicci pinsari,  
tu si’ Nicola lu rimita piu:  
‘na vota ‘nsemi stesimu a prjari.

Comu ti ‘rriiducisti! Cchi t’ha fattu!  
Ti cumminasti sulu peddi e ossa;  
ti canuscii diversu all’ura ‘n attu:  
ora si’ bonu a inchiri la fossa!

si vidunu li colpi ca ti dasti,  
li pedi tò su’ tutti pizzati;  
dimmilla tutta ‘a fami ca pigghiasti:  
li carni tò comu su’ sdisiccati!

Fratuzzu miu, cchi pena ca mi fai,  
cuntimi qualchi cosa di ‘sti anni  
doppu ca ti lassai; dunni stai?  
Ppi tettu cci su’ petri o puru canni?”.

La facci di Nicola si ‘nchiariu,  
l’occhi all’impruvvisu cci brillanu:  
“Chiddu di Maniaci sugnu iu:  
Nicola, ‘u zitu scappatu d’Adranu”.

Li du’ santi si ficiru ‘na festa,  
cosi ca sulu iddi sanu fari;  
Nicola poi cci dici su si resta  
e ansemi si mettunu a prjari.

“Ti riordi, ‘na vota ti ‘mmitaiu?  
Si tu cci stai, iù ti fazzu strata,  
ti fazzu taliari dunni staiu:  
veni ccu mia, pigghiamu ‘sta ‘cchianata”.

E fu lu primu ca la grutta visti  
dunni Nicola stesi mentri vivu:  
“Sugnu cuntentu ora ca vinisti:  
haiu ‘spittatu tantu lu tò arrivu”

e vinni lu mumentu di mangiari,  
ma li du’ santi mancu cci pinsanu;  
l’acula santa ‘n celu cci cumpari  
e cci purtau lu pani quotidianu.



‘Ddà vota cci purtau ‘n pani sanu:  
erunu dui li santi di sirviri;  
lu pani di lu Celu si mangianu,  
ppi cumpanaggiu l’acqua di viviri.

Passanu ‘nsemi tutta la jurnati,  
parrannu sulu di Diu e di Santi,  
e quannu arrivanu a la scurata  
lu suli cci va a codda ‘ddà davanti;

e ‘nveci di irisi a curcari  
tutta la notti stesiru prjannu  
e nun c’è cosa ca li po’ stancari:  
parrassiru di Diu tuttu l’annu.

‘Nta ‘ddi paraggi c’era scuru fittu,  
ma ‘nti la grutta c’era jornu chiaru  
pirchè lu Celu ‘n lustru binidittu  
a li du’ santi duna comu ‘n faru.

L’alba spuntau e lu suli cumpari,  
mentri l’aceddi ‘bbolunu cantannu.  
Dici Larenzu: “Amicu, t’ha’ a lassari,  
fursi ca ni videmu ‘n’autru annu”.

“Fratuzzu miu, Nicola cci rispunni,  
supra ‘sta terra cchiù nun ni videmu  
e diriti ‘sta cosa mi cunfunni:  
pensu ca a Diu prestu ni nni jemu”.

“Sugnu cuntentu ca mi lu dicisti,  
prima ca moru iù m’ha’ prepararari;  
sugnu cuntentu ora ca ti visti,  
luntanu vaiu, nun pozzu ristari”.

Larenzu parti. “ ’N celu ni videmu”,  
Nicola chiangi, mentri lu saluta  
e resta sulu ancora ‘nti l’eremu,  
sempri sicuru ‘n Diu ca l’aiuta.

Nun passa l’annu e Larenzu muriu:  
Nicola visti l’alma di lu Santu  
vulari ‘n celu ritta versu Diu  
e all’angili fa coru lu so cantu.

*Il miracolo delle mele*

‘**N** jornu Nicola turnava a la grutta  
doppu ca hava statu a lu cunventu;  
stava facennu ‘na strata cchiù curta  
e cci giuvau ppi fari ‘n purtentu.

Supra di ‘n muru stancu si ‘ssittau,  
prima di ripigghiari la ‘chianata,  
e, pinsannu, davanti cci spuntau  
‘na cumitiva giustu ppi ‘ddà strata.

Du’ fimmini vinevunu purtannu  
cannistri chini di puma e di frutta;  
‘nti ‘ddà scinnuta una jeva stancannu  
e l’altra era lesta e svelta tutta.

Lu Santu cci diciu: “Li mè suruzzi,  
datimi ‘n pumu pp’amuri di Diu;  
mangiunu tutti puru l’acidduzzi,  
farcitimi passari ‘stu disiu”.

Chidda cchiù lesta tuttu lu uardau,  
si fici laria e lu mussu sturciu  
e ‘sti paroli duri cci jttau:  
“Cchi dumanni? Si’ vili, amicu miu!

Vacabunnu, pizzenti e dumanneri,  
pirchè nun ti nni vai a travagghiari?  
‘nveci di stari sempri peri peri,  
ccu lu suduri buschiti ‘u mangiari.

Li strati di ‘sti tempi scattianu  
di vili e bacchittuni comu a tia  
e cchi su’ lesti a proiri la manu  
a nomu di la Vergini Maria”.

Cci dici a la cumpagna: “Cchi sta fannu?  
‘ppizzati su’ li pumi ca cci proi;  
chistu c’è bituatu dumannannu:  
tiramu avanti, fatti ‘i fatti toi”.

Ma la cumpagna era bona di cori,  
cci fici pena mentri lu uardava  
e pensa: “Chistu si nun mangia mori”,  
cchiù lu uardava e cchiù lu piatiava.

“Pirchè lu tratti ccu la vucca amara?  
Taliu ‘nti l’occhi cchi su’ duci  
e ppi du’ tinti puma ti ‘nningava,  
facennusi pietusu ‘nti la vuci?”;

pigghia la frutta, cci la metti ‘e peri:  
“Mangiti chidda ca ti vò mangiari;  
riorditi di mia ‘nta li prjeri  
e di chiddu ca ha’ nasciri macari”.

Nicola ‘ddi du’ puma si mangiau,  
cci dissi grazii e doppu si nni jiu,  
la strata di la grutta ripigghiau  
e ‘n menzu d’i fratini scumpariu.

E li du’ donni, sempri cuntrastannu,  
ripigghiunu la strata ppi li casi:  
“A mia nun mi ‘mbrogghiunnu prjannu”  
e l’altra cci fa: “Cchi ti ni trasi?”

Cchi ti custava daricci du’ puma?  
Cchi fa, pirdevi tutti li tò aviri?  
Si’ pizzulenti e dari ti cunsuma,  
ca si’ tirata puru ‘nto spinniri”.

‘Rrivannu a lu paisi, si spartenu,  
ognuna a la so casa si nni jiu:  
a la prima li puma ‘nfracitenu,  
di l’altra la coffa si ‘llinchiu

pirchè lu Celu sempri binidici  
la casa ca fa tanta carità  
e li so mura su’ ricchi d’amici:  
li premia Cristu ccu la So buntà.

*La morte santa*

**M**a doppu cinquant'anni ca nasciu  
l'aquila 'n jornu cchiù nun ci turnau  
e lu santu capisci ca finiu  
lu so tempu ca Diu distinau.

È propriu lu jornu giustu giustu  
d'a festa di Maria Assunta 'n celu:  
era lu jornu chinnici d'agustu.  
La morti s'avvicina comu 'n velu.

Nicola, sempri stannu 'nginucchiatu,  
senti ca sta mancannu la valia,  
'ncuminciau a mancaricci li ciatu  
Perciò prjau la Vergini Maria:

“Vergini Santa, Matri di l'Aiutu,  
'rrivau lu mumentu di partiri;  
dammi la manu Tu 'nta 'stu minutu  
e 'nta li vrazza tò fammi muriri;

allinchimi lu cori Tu d'amuri  
e mentri moru dammi Tu la paci,  
ti pozzu uffriri sulu li duluri,  
ma portimi ccu Tia, suddu Ti piaci.

Prisentila a Tò Figghiu la mè vita,  
a Tia nun dici no lu Cristu Santu;  
gradiscila ‘sta vita di rimita,  
fammi sintiri di l’ancili ‘u cantu.

Signuri ‘Nniputenti Unicu Diu,  
pietà dumanni prima di muriri;  
piccaturi lu sacciu sugnu iu:  
sulu la Tò buntà mi po’ capiri.

La vita mia, Signuri, mi la dasti  
e di l’aiuto Tò mi pruvvidisti;  
lu pani binidittu mi mannasti,  
li mè nicissità Tu li capisti”.

Prjau du’ jorna sani lu Signuri,  
la Vergini e li Santi tutti pari,  
mentri lu corpu chinu di duluri  
propriu nun ci la fa mancu a ciatarii.

Adagiu adagiu la vita lu lassa  
ccu l’occhi ca uardunu luntanu;  
di la vita a la morti iddu passa  
e Maria lu guida pianu pianu

L’ancilu canta di Nicola ‘a storia  
la morti, fidi e tutta la so vita,  
di comu a Diu desi sempri gloria  
‘nta ‘na grutta facennu lu rimita,

di la so vita di prjeri china  
e di lu corpu so marturiatu,  
di comu amau la Matri divina  
finu ca 'nti lu celu fu chiamatu.

L'angili tutti stavunu a cantari  
pirchè la gioia 'nti lu Paradisu  
è data sempri di l'eternu amari:  
amari nun è mai tristizza o pisu!



## *Ritrovamento del Santo e trasporto al Rogato*

**S**puntau l'alba di lu diciassetti,  
li campani si misiru a sunari;  
'n angilu 'i Diu li manu cci metti  
ppi fari a tutt'a genti rusbigghiari.

Di l'Alcara li porti si grapenu  
e li strati si 'llinchiunu di genti,  
mentri 'nti la chiazza si nni jenu  
ppi sapiri la nova pristamenti.

“Chhi succidiu, cu' è ca sunau?”,  
ma nuddu d'iddi sapi la risposta  
e l'arcipreti allura cunsigghiau:  
“Spiari a lu Rugatu cchi ni costa?”

qualcunu fu mannatu a lu cunventu,  
a lu Gusmanu ppi cci dumannari  
su 'ntisi puru iddu lu purtentu  
ca fici tutta Alcara rusbigghiari.

E lu Gusmannu chistu rispunniu:  
“Suli sulì sunanu li campani,  
ca 'n Santu oggi 'n celu si nni ju;  
prjati 'nsemi tu e li paisani.

Canusciu ‘n rimita santu e piu  
ca ‘u sabitu vinia ccà a prjari;  
ma oggi di sicuru iddu muriu:  
‘sta simana nun l’haiu vistu ‘rrivari.

Ma nun sacciu lu postu dunni stava  
ca, doppu ca prjava, si nni jeva;  
versu di la muntagna caminava  
e, passannu lu ciumi, scumpareva”.

L’omu a lu paisi riturnau,  
a la genti li cosi riferiu;  
d’u Gusmanu ‘i paroli cci cuntau  
e lu so nvitu di prjari Diu.

Trasenu tutti ‘n chiesa ppi prjari,  
fimmini, vecchi, granni, picciriddi  
e, nun sapennu cchi pisci pigghiari,  
si toccunu pinsannu li capiddi.

All’impruvvisu comu ‘na vintata  
trasiu ‘n omu ‘ssuppatu ‘i suduri;  
di cursa iddu vinia di ‘na cuntrada  
tuttu ‘ffannatu ppu lu gran caluri.

“Paisani sintiti cchi vi cuntu:  
purtaì a lu Calanna li crapuzzi,  
iù fazzu ‘stu misteri e nun mi ‘ffruntu,  
sugnu pasturi ‘i pecuri e agnidduzzi.

Li picureddi sempri mi li cuntu,  
ma 'sta matina ni pirdii 'na para;  
jennu circannu, trovu a 'n certu puntu  
ammucciata 'na grutta 'ntra la sciara.

Spustai li frasciami ppi trasiri,  
mentri lu cani si misi a 'bbaiari,  
mi sforzu poi circannu di vidiri  
li pecuri ca vinni ccà a circari.

E 'nveci cchi truvai? Santu Diu!  
mi rizzunu li carni si cci penzu...  
e giustu giustu lu truvai iu  
ccu ciauru di ciuri, rosi e 'ncenzu.

Liuni di Rancugghia è lu mè nomu,  
sugnu d'Alcara e tutti ccà lu sanu;  
truvai 'nti 'ddà grutta 'n Santu omu,  
la prova è chista: mi siccau la manu;

ccu 'nvastuni lu trovu 'nginucchiatu,  
sbarratu a cruci supra di lu pettu,  
'n Rusariu 'nti la manu e 'n libru usatu  
d'i patri basiliani, cci scummettu.

Mi parsi vivu comu lu truvai,  
ccu l'occhi aperti, ccu 'n surrisu duci;  
mi 'vvicinai anticchia e lu chiamai;  
nenti! Cchi fa nun senti la mè vuci?

Cchi fa lu disturbai o ‘sta durmennu?  
Ora lu toccu ppi lu rusbigghiari...  
isu lu vrazzu... cchi sta succidennu?  
Sentu la manu fridda divintari.

Scappai di la grutta tramutatu,  
di cursa lu Calanna ‘bbannunai;  
uardati lu mè vrazzu ormai ormai siccatu:  
lu fattu tuttu paru vi cuntai”.

Dicidunu all’istanti di partiri,  
a lu Calanna tutti di ‘cchianari  
e ccu li propri occhi di vidiri  
su è veru o sbagghiату ‘ddù cuntari.

Liuni ‘n prima fila li guidau  
versu la grutta di lu Santu mortu  
e, mentri a tutti ‘u postu cci ‘mmustrau,  
cci sanau lu vrazzu ch’era stortu.

Tutta la genti casca ‘n ginucchiuni,  
li muti ‘ncuminciunu a parrari,  
lu primu favuritu fu Liuni  
ca lu vrazzu si visti risanari.

Doppu, supra ‘na vara ‘mpruvvisata,  
cci misiru lu Santu ‘nginucchiatu  
e d’Alcara ripigghiunu la strata  
ppi essiri di tutti viniratu.

A lu scinniri ‘u biviu ‘ncuntranu  
di la strata ca porta a lu Rugatu;  
sutta la vara a colpu si firmanu  
ca lu Santu di chiummu è divintatu.

Pirchè si fa pisanti all'impruvvisu?  
Lu mutivu qual è di ‘stu purtentu?  
“A lu Rugatu – si senti pricisu –  
purtatilu cchiù tostu a lu cunventu”.

Ma cu’ parrau e di cu’ è ‘ddà vuci?  
Di ‘n picciriddu, natu ‘ddà simana!  
Fu proprio iddu, fu ‘ddà vacca duci:  
autru miraculu pp’a menti umana.

Pigghiau lu Gusmanu la parola,  
chiancava mentri a tutti cci cuntava  
nascita, storia e vita di Nicola,  
li pinitenzi so ca Diu amava.

“Fratuzzi tutti, statimi a sintiri:  
chistu è Nicola, Puliti ‘u casatu,  
partiu d’Adranu e ccà vinni a muriri  
pirchè di Diu a ‘sta vita chiamatu.

A iddu ‘u cunfissai ppi trent’anni,  
havia lu cori puru comu ‘n gigghiu  
e ora tirminanu li so affanni:  
vantu d’Adranu e d’Alcara lu gigghiu”.



*Fama di miracoli*

**T**riccentu trenta sei anni passanu  
d'u jornu ca Nicola fu purtatu  
a lu Rugatu e 'n chiesa lu lassanu  
ppi comu lu truvanu 'nginucchiatu.

Ppi tantu tempu 'a carni nun si sfici,  
'u corpu so ristau profumatu:  
'u Patr'Eternu ca li cosi fici  
cunserva doppu mortu lu biatu.

Fra tutti li miraculi fu chistu  
chiddu cchiù grossu vistu a lu Rugatu:  
Nicola doppu mortu, comu Cristu,  
di la nurmaltà nun fu tucatu.

E li frati ppi megghiu rispittallu  
lu misiru 'nti 'n arca dicurata  
pirchè la genti a forza di tucallu  
tutta la vesti s'havia già sfardata.

La genti si parteva di luntanu  
sintennu muntuari di Nicola  
e a cu' dumanna ccu lu cori 'n manu  
Diu lu senti e sempri lu cunsola.

Cu' dumannau ccu fidi fu primiatu  
e lu malatu ebbi la saluti,  
lu cori afflittu resta cunsulatu:  
sanati su li zoppi e puru 'i muti.

Assai su' li miraculi cuntati  
fatti di Diu pp'amuri di Nicola;  
di chisti tanti ormai su' scurdati:  
lu scrittu resta e vola la parola.

Hatu sintutu di la barunissa  
vinuta 'i Militeddu ccu lu figghiu?  
Ebbi la grazia e facennu la fissa  
pinsau "na riliquia mi pigghiu!";

ma nun si ponu li santi tucari  
senza pirmissu di lu Patri Santu  
e, doppu vistu lu figghiu 'nnurbari,  
cunfessa lu so sbagghiu 'ntra lu chiantu.

Quattr'anni hanu passatu e c'è 'stu fattu:  
tanti misi nun chiovi e tuttu sicca;  
'nti la natura chioviri è di pattu:  
senza di l'acqua si ricogghi picca.

Perciò tutti si misiru a prjari,  
spirannu 'nti l'aiutu di lu Santu,  
e Diu la fidi vosi primari:  
di li so figghi sintiu lu chiantu.



E l'acqua disiata cci 'rrivau,  
la terra parsi tutta respirari,  
lu siminatu vita ripigghiau,  
crisciu la spiranza di mangiari.

Cchi diffirenza ca c'è ccu l'antichi  
ca oggi cchiù nun s'usa di prjari!  
Nuatri stissi ni facemu nichì  
ca senza Diu è sulu 'bbabbiari!



## *Rivalità tra Adrano e Alcara*

**L**a fama di Nicola e li purtenti  
fora d'Alcara prestu caminanu;  
comu si li purtassiru li venti  
macari 'nti Adranu cci 'rrivanu.

E fu dicisu d'aviri lu santu,  
'nti la so terra di lu ripurtari:  
si partunu di cori, senza scantu  
e di chistu nun c'è di si 'ffruntari.

Di lu Rugatu furzanu li porti,  
lu corpu di Nicola si pigghianu  
e 'ntra lu scuru, caminannu forti,  
li prodi pensunu ca su' luntanu.

Ma li campani 'ttaccaru a sunari  
comu lu jornu quannu fu truvatu;  
nun c'è bisognu cchiù di caminari:  
hanu giratu attornu a lu Rugatu.

Li 'ddurnisi si misiru a scappari  
ca la genti d'Alcara già 'rrivau:  
"Lu nostru Santu voli ccà ristari",  
ppi eguismu chistu si pinsamu!

Di l'Alcara Nicola nun nisciu  
pirchè li Santi, puru doppu morti,  
vidunu sempri lu giustu disiu,  
nun pirmittennu mai li cosi storti.

Nun era chidda la strata diritta  
pp'aviri 'na reliquia di lu Santu;  
l'arbitriu sempri è la strata cchiù stritta  
e ogni cosa v'a finisci 'i cantu.

## Canonizzazione

**D**icisi Alcara di mannari a Roma  
Rundu e Cuttuni, preti e magistratu,  
pp'aviri di Nicola lu diploma  
di Santu di lu Papa dichiaratu.

A Roma 'u Papa Giuliu secunnu  
tutta la Chiesa 'i Diu guvirnava;  
'nta li so manu tineva lu munnu  
e ccu la spata 'a liggi amministrava.

Doppu quattr'anni 'u tempu già bulau  
senza putiri 'ddù fattu 'bbirsari;  
la scorta di li soldi tirminau  
e l'Alcarisi stanu ppi turnari.

Sunu scuntenti ccu lu cori afflittu:  
a Roma cchi è ca hanu cchiù di fari?  
Nun ci su' soldi mancu ppi l'affittu:  
resta Nicola ca li po' iutari.

E mentri sunu tristi e pinsirusi,  
li chiama e cci va a parra 'n pilligrinu:  
"A Ostia iti, 'scutati carusi,  
parrati a 'stu 'ndirizzu ccu 'n parrinu"

e dittu chistu, senza ‘na parola,  
li lassa e ‘nta nenti scumpariu:  
si, lu ‘nzirtastivu, era Nicola,  
ppi li iutari, mannatu di Diu.

Li dui, ‘rrivati a Ostia, truvanu  
lu Brevi tantu tempu disiatu  
e Giuliu Puntefici Rumanu  
scrissi di pugno lu fogghiu bullatu:

“Vistu ca ‘nti vuatri si anurau  
lu Biatu Nicula dittu ‘U zitu,  
è Santu lu Puliti Niculau:  
lu fistiggiati ccu lu santu ritu”.

E finalmente fu ricanusciutu  
lu meritu e la vita di Nicola  
ca ni proteggi e ni duna l’aiutu:  
basta prjallu ccu fidi e parola.

Lu Santu ha statu sempri ‘n veru amicu  
d’Alcara e d’Adranu ccu purtenti;  
tanti ni fici ‘nta lu tempu anticu  
e ni fa tanti puru a lu prisenti.

‘Nto milli setticentu nuvant’unu  
‘n certu Currau ccu li muraturi  
supra lu tettu di la chiesa sunu  
ppi la ‘bbirsari di li spaccaturi.

All'impruvvisu scapolau 'u peri  
e, mentri casca, a San Nicola chiama;  
senza di Diu sunu uai seri:  
arriva 'n terra sanu e mancu brama.

C'era 'na matri ccu 'n figghiu carusu  
ca si torceva vivu d'u duluri;  
purtava 'n mali d'accussì gravusu  
ca nun ci potti 'a scienza e li so curi.

Ma 'nti lu cori havi tanta fidi,  
'a matri 'u figghiu porta 'nti l'altari:  
"Nicola, parra a Diu ca tuttu vidi,  
su Iddu voli, mi lu poi sanari".

E Nicola la grazia già cci fici:  
'ddù picciriddu nun ebbi cchiù nenti.  
Diu ni iuta ppi li so amici  
e ni pirduna piccati e lamenti.

Cci bastunu li fatti c'haiu cuntatu  
ppi diri la grannizza di lu Santu;  
ni scrissi dui e pensu c'ha bastatu,  
di tutti l'autri si nn'ha scrittu tantu.

*Il Sacro Teschio in Adrano*

**A**dranu troppi voti ci tintau  
d'aviri qualchi cosa di lu Santu,  
ma la pia 'ntinzioni nun bastau  
e fu usata la forza e lu scantu.

Alcara, ch'era tantu affizziunata  
a Nicola, nun senti nudda scusa:  
puru quannu di Roma è cumannata  
a 'Ddirnò la reliquia ci ricusa.

Quannu si parra di cosi di Diu  
la forza nun s'avissi a muntuari;  
cu'è 'mmuttatu di giustu disiu  
si vidi sempri 'nta lu so amari.

Senza l'accordu ebbimu la Testa,  
Alcara nun la vosi mai muddari.  
Ppi Adranu finalmente è granni festa:  
pirchè ni ci facistivu arrivari?

Guidati di Curtisi e Patri Bua,  
Alcara è minacciata d'i fucili:  
so patri cci 'rrivau, la testa è sua.  
Agisci l'omu e Diu tira li fili!



Patri Branchina assai travagghiau  
pp'avirisi di Roma lu pirmissu;  
di seculi lu sognu curanau,  
tra Adranu e Alcara si grapiu 'n abissu!

Lu milli novicentu vintisei!  
Fu chistu 'n annu di festa ppi Adranu  
e ancora oggi a li jorna mei  
si cunta sempri 'ddù colpu di manu.

Cchi vali amari Diu e San Nicola  
quan'è ca nun vulemu cchiù scurdari?  
Liggemu lu Vangelu ca fa scola:  
pp'amuri fussi megghiu pirdunari.



## *Cenno bibliografico*

**L**a storia di Nicola la sapemu  
pirchè ni la cuntau lu Gusmanu,  
di comu arrivau 'nta 'dd'eremu  
quannu scappau di la patria Adranu.

Di la so vita scrissiru macari  
lu Monicu Sincronu e Gaietanu;  
tutti i fatti nun pottiru cuntari,  
ma ci bastanu chiddi ca lassanu.

La vita, la cchiù fina e cchiù pricisa,  
la scrissi lu Pitroniu adranita;  
amuri e cultura cci nn'è misa:  
eternu mumentu a lu 'Rimita.

Cci misi cori, arti, 'ntelligenza,  
cci misi sennu e bona voluntati  
e cu' la leggi 'nti la menti penza:  
chistu è parrari giustu di biati!



## Ringraziamento

Ora ca iù finii di 'stu parrari,  
ringraziu a la Vergini Divina  
e nun finisciu mai di La ludari  
ca 'nti la vita m'ha statu vicina.

Grazii Matri Santa 'Mmaculata,  
grazii a vui Vergini Putenti;  
renni filici Tu la mè jurnata,  
guidannu versu Diu la mè menti.

Oh Nicola serafinu  
di lu celu ni pruteggi;  
Tu ca a Diu si' vicinu  
dacci aiutu a cu' ni leggi;

porta sempri 'nti lu cori  
gioia, amuri e cuntintizza;  
a cu' preja quannu mori  
facci aviri la salvizza.



*Sonetto di chiusura*

Iù nun scrissi 'sti versi ppi l'onuri  
e nun li scrissi ppi cci guadagnari;  
versu lu Santu li fici pp'amuri  
ca 'stu travagghiu mi vosi dittari.

Scrissi 'n sicilianu e mi nni vantu,  
dunni nun ci 'rrivaiu mi nni pentu,  
spirannu ca vi piaci lu mè cantu:  
basta ristati ccu cori cuntentu,

pirchè ci basta ca vi 'ntirissati  
pp'a vita di Nicola l'Adranita;  
mittemu ca 'sti versi su' 'ppizzati,

mi basta ca liggennu la so vita  
macari unu grapi novi strati.  
VIVA NICOLA LU SANTU RIMITA





## INDICE

Prefazione .....	1
Invocazione.....	3
Per il lettore .....	7
Adrano .....	11
Sonetto d'apertura .....	17
Adrano e nascita di Nicola .....	19
Primi anni .....	23
Nicola "Lu zitu" in fuga .....	25
Nella grotta dell'Aspicuddu .....	29
Altra fuga di Nicola.....	33
La tentazione .....	35
Incontro a Maniace con S. Lorenzo da Frazzanò.....	39
La sorgente miracolosa.....	43
Invocazione - Alcara li Fusi .....	47
La grotta del Calanna.....	49
Il Rogato e l'incontro con il Gusmano .....	53
La preghiera.....	55
Vita eremitica .....	57
L'aquila.....	59
Secondo incontro con San Lorenzo.....	61
Il miracolo delle mele.....	65
La morte santa .....	68
Ritrovamento del Santo e trasporto al Rogato .....	71
Fama di miracoli.....	77
Rivalità tra Adrano e Alcara.....	81
Canonizzazione.....	83
Il Sacro Teschio in Adrano.....	86
Cenno bibliografico .....	89
Sonetto di chiusura .....	93